

Qalam

Bilangan 61 – August 1955 Zulhijjah 1374 – 60 sen

Berkorbanlah!

Labbayka Allāhumma labbayk – inilah hamba-Mu hai Tuhanku, inilah hamba-Mu menunaikan panggilan-Mu! Inilah sahutan umat Muslimin di padang tandus Arafah menyambut seruan Tuhanneya di dalam hari raya korban yang kita rayakan hari ini! Pada dewasa itu hati manusia adalah bersiap-sedia untuk mengorbankan dirinya, hartanya, kepada jalan Allah – mengaku bersedia member pengorbanan untuk menegakkan kalimah tiada Tuhan yang disembah melainkan Allah! Pada hari itulah sepatutnya tiap-tiap hatikita, jiwa dan ruh kita menyempurnakan kehendak dan janji yang kita ucapkan sebanyak lima kali sehari semalam: “Sembahyangku, ibadatku, hidupku dan matiku kerana Allah Subhānahu wa Ta‘ālā” – memberipengorbanakerana Allah? Marilah di dalam hari raya korban ini kita tafakkur bersama-sama bagi mengetahui adakah kita telah member pengorbanan atau tidak.

Di sebalik itu kita ucapkan selamat berhari raya selamat member pengorbanan dan menganjurkan supaya tiap-tiap umat Islam hendaknya siap sedia berkorban untuk menegakkan kemuliaan agama kita.

Berhati-hatilah!

Tatkala membidas kenyataan Hāji ‘Abdullāh ‘Ābbas yang menganjurkan supaya orang-orang Islam hendaklah memilih orang-orang Islam sahaja, Tengku Abdul Rahman putera Yang di-Pertua UMNO

dan seorang kuat ahli Perikatan UMNO – M.C.A

- M.I.C. di antara lain-lain mengatakan bahawa yang demikian itu akan menerbitkan satu perkara: perjuangan dan petumpahan darah. Yang demikian itu katanya adalah sangat merbahaya sambil berkata pula bahawa adakah kita akan suka melihat perempuan dan kanak-kanak kita mati, atau menyebabkan perempuan-perempuan dan kanak-kanak lain mati?

Kita sangat berduka cita melihat percampuran Tengku itu kepada perkara-perkara yang mengenai agama dan membidas fahaman-fahaman agama itu dengan tidak menyiasat atau bertanya lebih dahulu kepada sahabat-sahabatnya atau dengan lebih terang kepada “penasihat-penasihat” agamanya kerana dengan kejihilannya, sekalipun ia seorang Islam terus sahaja menuju kepada orang-orang yang membawa keterangan-keterangan agamanya dengan alasan-alasan yang kuat menyentuh hendaklah memilih orang-orang Islam – tidak orang yang bukan Islam sebagai mewakilinya di dalam pemerintahan yang mengenai masyarakatnya.

Adakah orang-orang yang bukan Islam itu boleh dipercayai untuk menyelenggarakan halehwal orang Islam? Bagi orang Islam jawabnya tentu tidak tetapi bagi Tengku yang mendasarkan perjuangannya kepada “kebangsaan” (mengikut istilah kebangsaan Perikatan) tentu tidak gemar mendengar yang demikian itu kerana berlawanan dengan perasaan nafsunya.

Kewajipan bagitiap-tiap orang Islam mengikut perintah daripada Tuhan – bukan kemauan hawa nafsunya – adalah diperingatkan jangan sekali-kali memilih orang-orang kafir untuk dijadikan pemimpin baginya. Di dalam surah Āli ‘Imrān ayat 28 Tuhan dengan terang menyatakan (maksudnya): “Janganlah orang-orang Mukmin menjadikan orang-orang kafir itu pemimpin selain daripada orang-orang yang beriman”.

Di dalam surah al-Nisā’ ayat 144 firman-Nya (maksudnya): “Hai sekalian orang-orang yang beriman janganlah kamu jadikan orang-orang kafir itu pemimpin-pemimpin selain daripada orang-orang yang beriman.”

Beralasan dengan ayat-ayat ini dan lagi peringatan-peringatan lain yang nyata dan tepat diperintahkan Tuhan, maka apakah salahnya bagi seseorang Islam memperingatkan saudara-saudaranya jangan memilih orang-orang kafir jadi pemimpinnya? Apakah dengan kerana anjuran itu, jika terpilih orang-orang Islam, akan menimbulkan perjuangan atau penumpahan darah? Apakah Islam itu mengikut faham Tengku sebagai suatu agama yang ganas dan buas?

Tidak! Islam tidak buas! Hak-hak orang kafir ada ditentukan. Orang-orang Islam di mana jua, terutamanya yang banyak mempunyai suara memilih adalah diwajibkan oleh Tuhan memilih atau menjadikan pemimpin-pemimpinnya daripada orang-orang Mukmin – tidak daripada orang-orang kafir. Yang demikian diterima atau tidak oleh Tengku tidaklah menjadi soal tetap yang demikian itu adalah suatu perintah.

Di dalam masa menyeru orang-orang mengundi dalam pilihanraya yang berjalan sekarang sebenarnya banyak perkataan-perkataan yang diterbitkan oleh Tengku dan pengikutnya yang menyakiti perasaan umat Islam kerana itu umat Islam wajib waspada menghadapi yang demikian kerana agama kita sekarang sedang dipermain-mainkan adanya.

*

Tegahan Berpolitik Di Masjid

Kerajaan Perak telah mengeluarkan satu keputusan bahawa masjid-masjid seluruh negeri Perak tidak dibenarkan untuk dijadikan tempat syaran-syaran yang mengenai halehwal politik. Sekali imbas keputusan ini ada baiknya tetapi apabila kita perhatikan pula kedudukan agama Islam dengan pengajaran-pengajarannya maka dengan sendirinya kita tetap akan membantah keputusan itu.

Masjid, pada selayang pandang, adalah tempat ibadat tetapi erti masjid bagi Islam ialah tempat merundingkan segala sesuatu yang mengenai hal ehwal masyarakatnya, dan sebagaimana juga diketahui pada zaman Rasulullah (SAW) masjid itu dijadikan pula tempat pertolongan cemas dalam masa peperangan

atau darurat. Dengan ini terang masjid itu ertiinya bagi Islam sangat besar: ia adalah tempat merundingkan segala sesuatu yang mengenai masyarakatnya dan tidak terasing pula perkara-perkara yang mengenai hal ehwal siyasah yang mengenai masyarakat ini.

Bagi orang-orang Islam yang luas pandangannya, bahawa agama (*religion*) itu ialah suatu agama yang meliputi segala-galanya di dalam kehidupan manusia dan kerana itu ia tidak dapat dipisahkan daripada siyasah atau politik yang mengenai ketatanegaraan – urusan-urusan negara, dan sebagaimana dimaklumi. Bahawa bagi tiap-tiap umat Islam adalah dipertanggungjawabkan untuk menegakkan pemerintahan Tuhan di mana jua tempatnya berada. Kewajipan-kewajipan sangat berat – dan tiap-tiap umat Islam dituntut menunaikannya. Tetapi agama (*religion*) mengikut takrif orang-orang Barat adalah semata-mata ibadat (persebahaman kepada Tuhan) sedang perkara-perkara yang lain adalah tidak dipertanggungjawabkan kepada pengikut-pengikutnya.

Kita tidak mengetahui, adakah yang dimaksud mengeluarkan peraturan ini kerana berpegang kepada fahaman-fahaman Barat mengikut istilah beragama tetapi jika pun begitu tidaklah yang demikian itu direhdhai oleh umat Islam. Kita umat Islam adalah wajib membantah kecerobohan yang dilakukan oleh pemerintahan kepada kebebasan beragama di dalam negeri ini. Kita wajib menuntut supaya keputusan itu dibatalkan kerana keputusan itu bermakna menghalang kebebasan masjid itu untuk kmenyelenggarakan masyarakatnya.

Kejadian yang serupa ini mengingatkan kita bagaimana di Indonesia dalam sedikit masa yang lalu ada percubaan-percubaan hendak menyekat kebebasan beragama seperti yang tersebut di atas tetapi kerana umat Indonesia sedar akan bahayanya undang-undang yang serupa itu maka mereka langsung membantah – kesudahannya undang-undang yang demikian dibatalkan.

Umat Islam insaflah! Perhatilah segala percubaan-percubaan yang menyekat segala langkah dan gerak-geri kita yang dibebaskan dan dituntut kita menyelenggarakannya.